

og af orkuveitusvæði Rafmagnsveitna ríkisins. Hlutverk stjórnar er að fylgjast með að skipulag og starfsemi Rafmagnsveitna ríkisins sé jafnan í réttu og góðu horfi. Þá fjallar stjórnin um meginstefnu í starfsemi fyrirtækisins og skal rafmagnsveitustjóri kynna stjórninni þau málefni sem talist geta haft veruleg áhrif á starfsemi og afkomu fyrirtækisins, áður en ákvörðun er tekin um þau. Meðal þeirra mála sem þar geta fallið undir eru framkvæmda-áætlanir, gjaldskrármál, skipulagsmál og framtíðarstefnumörkun. Um starfskjör stjórnarmanna fer samkvæmt nánari ákvörðun ráðherra.

## 3. gr.

Reglugerð þessi, sem samþykkt er af stjórn Rafmagnsveitna ríkisins, er hér með staðfest samkvæmt vatnalögum nr. 15/1923 og orkulögum nr. 58/1967 til að öðlast gildi þegar í stað.

*Iðnaðarráðuneytinu, 23. apríl 1997.*

**Finnur Ingólfsson.**

*Halldór J. Kristjánsson.*

## SAMÞYKKT

### um kattahald á Breiðdalsvík, S-Múlasýslu.

## 1. gr.

Sveitarstjórn er heimilt að takmarka eða banna kattahald á Breiðdalsvík, ef til þess er talin brýn þörf að mati heilbrigðisnefndar, héraðslæknis eða viðkomandi héraðsdýralæknis.

## 2. gr.

Þrátt fyrir ákvæði 1. gr. er aldrei heimilt að halda fleiri ketti en tvo eldri en þriggja mánaða á sama heimili.

## 3. gr.

Allir heimiliskettir skulu bera merka hálsól með bjöllu þar sem fram kemur nafn eiganda, heimili og símanúmer.

## 4. gr.

Alla heimilisketti skal ormahreinsa reglulega, a.m.k. einu sinni á ári, eða oftari ef þörf krefur. Eigendur katta skulu halda til haga vottorðum um reglulega ormahreinsun katta. Hvatt er til reglulegra bólusetninga katta gegn helstu smitsjúkdómum þeirra.

## 5. gr.

Eigendum katta er skylt að gæta þess að kettir þeirra valdi ekki nágrönnum ónæði, en geti að öðrum kosti sætt takmörkunum um kattahald hafi borist skriflegar kvartanir um ónæði, hættur eða tjón sem kettir þeirra sannanlega valda sbr. 1. gr. Eigendur katta eru ábyrgir fyrir tjóni sem kettir þeirra valda. Foreldrar eru ábyrgir fyrir köttum ólöggráða barna sinna.

## 6. gr.

Sveitarstjórn er heimilt að láta eyða ómerktum flækings- og villiköttum enda hafi framkvæmdin verið auglýst með áberandi hætti í sveitarfélaginu a.m.k. 7 sólarhringum áður en hún er framkvæmd.

## 7. gr.

Ef leyfishafi brýtur gegn ákvæðum samþykktar þessarar eða öðrum reglum sem um kattahald gilda, skal hann sæta skriflegri áminningu fyrir minni háttar brot. Vegna annarra brota getur sveitarstjórn bannað viðkomandi kattahald.

## 8. gr.

Sveitarstjórn er heimilt að leggja á gjald vegna kattahalds samkvæmt gjaldskrá sem sveitarstjórn setur og umhverfisráðherra staðfestir.

## 9. gr.

Sveitarstjórn annast eftirlit með kattahaldi, samkvæmt samþykkt þessari, undir yfirstjórn heilbrigðisnefndar. Leita má aðstoðar lögregluþyrvalda ef þörf krefur.

## 10. gr.

Ítrekuð brot gegn samþykkt þessari geta varðað sektum eða varðhaldi. Með brot skal farið að hætti laga um meðferð opinberra mála og að öðru leyti í samræmi við ákvæði laga nr. 81/1988, um hollustuhætti og heilbrigðiseftirlit, með síðari breytingum.

## 11. gr.

Samþykkt þessi sem samin er og samþykkt af sveitarstjórn Breiðdalshrepps staðfestist hér með samkvæmt 18. gr. laga nr. 81/1988, um hollustuhætti og heilbrigðiseftirlit, með síðari breytingum, til þess að öðlast gildi við birtingu.

*Umhverfisráðuneytinu, 17. apríl 1997.*

F. h. r.

**Ingimar Sigurðsson.**

*Sigurbjörg Sæmundsdóttir.*

## GJALDSKRÁ

### vegna kattahalds á Breiðdalsvík, S-Múlasýslu.

## 1. gr.

Sveitarstjórn er heimilt að leggja á gjald vegna kattahalds, sbr. 8. gr. samþykktar um kattahald á Breiðdalsvík, S-Múlasýslu frá því 17. apríl 1997.

## 2. gr.

Gjaldið er kr. 1.000 á ári fyrir hvern kött.  
Ormahreinsun katta er innifalin í gjaldinu.

## 3. gr.

Gjaldskrá þessi, sem samin er og samþykkt af sveitarstjórn Breiðdalshrepps, staðfestist hér með samkvæmt 18. gr. laga nr. 81/1988, um hollustuhætti og heilbrigðiseftirlit, með síðari breytingum, til þess að öðlast gildi við birtingu.

*Umhverfisráðuneytinu, 17. apríl 1997.*

F. h. r.

**Ingimar Sigurðsson.**

*Sigurbjörg Sæmundsdóttir.*